

CCLXXV.

*Lettre du Prince d'Orange au Magistrat d'Ypres. —
Même sujet que le numéro précédent. (Arch. Y.)*

Edele, eersaeme, wyse, discrete, lieve bezondere, Wy en twyffelen nyet oft ghylieden en condt genoech bevroeden wat grooter droeffheyd ons hebben veroorsaect de tydinghen die wy vernomen hebben van het overvallen ende innemen der stede van Cortryck, navolgende de affectie ende sunderlinghe genegentheyt die ghylieden altyt in ons moeght gespoert hebben tot het welvaeren van den gemeynen lande, hoe wel wy wel lange te vooren hebben voorsien dat zulcx moeste toecommen naedemael wy noyt dien van Cortryck en hebben cunnen verwillighen met allen den vertooch, ernstich versoeck, ja beden daeromme by ons zoo menichwerff gedaen, dat zy eenich garnisoen hebben willen innemen. Alzoo dat (hoe wel tot slants zeer grooten achterdeele) nochtans deur hun eyghen faulte ende ongehoirsameheyt zy in deze allende ende bederff zyn gevallen, dwelck al wel zoude hebben verhoedt geweest, zoo sy ons hier inne hadden willen verhooren. Nyttemin naedemael zulx nu geschiet is, moeten wy tzelve in gedult nemen, ende daeromme den moet nyet laeten sincken, maer liever met allen middel toesien dat by quade toesicht, onnaxaemheyt ende inobedientie de ande steden ende plaetsen nyet en commen te vallen in gelycke miserie. Ten welcken eynde hebben wy gescreven ende uuyterl begheert aen de vier leden van Vlaenderen, dat om alle voirdere peryclen te voircommen zy willen besorghen dat terstont over al zoo sy tselve sullen noodich bevinden de andere steden ende plaetsen, van vast ende volcomen garnisoen versien ende verzekeren. In conformiteyt van den welcken hebben wy insgelycx hiermede ulieden wel willen ons amptshalven ordonneren, dat ghylieden nyet en laet, zoo lieff als ghylieden zyt hebben ulieder welvaert ende verzeckerheyt, inne te nemen ende te aenveerden al zulcke compaignien als ulieden by den voirs. vier leden tot garnisoen, bewaringhe en verzeckerheyt ulieder stadt sullen gesonden worden.

1580
5 Mars.

Sonder ennighe excuse oft zwaricheyt te maecken, het zy op het getal, natie oft qualiteyt der zelve compaignien, de welke by ulieden aldaer op tbeste zullen onthouden ende geaccommodeert wordden, tottertyt toe dat men eenen bequamen legher aldaer zal geformeert ende opgericht hebben, dwelck wy verhopē dat eer langh zal geffectueert zyn. Wy hebben genoeg cunnen verstaen zoo uuyten brief van den colonel Balfour als anderssins daer te voren hoe zeer de stadt van Meenen in onverzien van alle nootelycke amunitien en andere victuailen, hebben daeromme oyck begeert aen de voirs. vier leden ordre gestelt te wordden dat de zelve in aller diligentie daer van wordde versien. Ghylieden weet hoe grootelyck de plaetse is belanghen ende van wat grooter consequentie de zelve is, is daeromme oyck ons uuyterlyck begheren dat by ulieden nieuwe uuyterste ende beste mogelycheyt wordde besorcht, ende alle goed behulp ende voirderingē gedaen, dat zulcx terstont ende zonder ennich vertreck mach geschieden.

Ende ons voirts vertrouwen op Ul. gehoorsaemheyt ende goede genegentheyt, zullen wy desen eyndigende, godt almachtich bidden,

Edele, eersaeme, wyse, discrete, lieve bezondere. Ulieden te gespaeren. Uuyt Campen den 5^{en} dach van Marty 1580.

De Prince van Orangien, Grave van Nassau en
Lieutenant generael, enz.

Ulieder goede vriendt tot uwen dienste.

GUILLE DE NASSAU.

* Aen edelen, eersaemen, wysen, discreten
onzen lieven bezunderen Borgmres ende Re-
gierders der Stede van Ypre.